

Hilmo Pašić^{*)}

POZDRAVNI GOVOR

Dame i gospodo, dragi gosti,

Čast mi je da Vas u ime Vlade Bosne i Hercegovine i svoje ime pozdravim i zaželim ugodan boravak u Sarajevu.

Danas smo ovdje da obilježimo 110-godišnjicu katastra Bosne i Hercegovine, Instituta značajnog iz više aspekata.

Savremeni katastar zemljišta Bosne i Hercegovine nastao je detaljnim premjerom zemljišta od strane Austrougarske, a razvija se i usavršava do današnjih dana. Na ovom poslu radile su i rade stotine geodeta, pravnika, poljoprivrednih i šumarskih stručnjaka.

Katastar zemljišta, odnosno podaci katastra zemljišta osnova su za sve privredne aktivnosti, definiranje teritorija države i utvrđivanje vlasništva.

Bosna i Hercegovine u proteklih 110-godina je prošla kroz nekoliko razvojnih faza katastra.



^{*)} Mr Hilmo Pašić, ministar pravde i opće uprave u Vladi Bosne i Hercegovine

Tako postoje faza Turskog, Austrijskog i postaustrijskog perioda. Svaki period ima svoje karakteristike, svoje uspone i padova.

Turski period karakteriše uspostava evidencija na uprošćenom načinu rada, takozvanom tapijskom sistemu, austrijski na brzom grafičkom premjeru zemljišta bez visinske predstave i na osnovama istog uspostava evidencija (posjeda i vlasništva) germanskog tipa, a postaustrijski primjena savremenih metoda i načina premjeravanja zemljišta, te izrada katastra zemljišta, katastra komunalnih uređaja i katastra nekretnina.

Bosna i Hercegovina od 1918. do 1953. godine radi na održavanju Austrijskog katastra i zemljišne knjige, a od 1953. radi na novom premjeru, uspostavi novog katastra zemljišta, a od 1984. godine i katastra nekretnina - jedinstvene evidencije nekretnina.

Osjećam za potrebno naglasiti da na geodetskom premjeru, izradi katastra zemljišta i zemljišne knjige rade generacije, da je na ovim poslovima angažovan veliki broj timova raznih struka i profila i da se ulažu značajna sredstva. Prikuplja se velik broj podataka o zemljištu i objektima, posjednicima i vlasnicima te karakteristikama prostora.

Katastar i zemljišna knjiga, kao temeljne evidencije prostora, u Drugom svjetskom ratu i agresiji na Bosnu i Hercegovinu, bile su predmet uništenja. Zašto je to tako, mislim da nije teško odgovoriti, posebno kada se ima u vidu preduzimanje najbrutalnijih aktivnosti od strane istočnog i zapadnog susjeda i domaćih nacionalista i šovinista usmjerenih na etničko čišćenje, posebno Bošnjackog naroda i zatiranje tragova njegove kulture na ovim prostorima iz prošlih vremena.

Kada se ova događanja imaju u vidu, postavlja se pitanje šta je raditi? Kako organizovati vodjenje i zaštitu ovih evidencija?

Po mom mišljenju, put je uvođenje automatizacije izrade i zaštite karata i geodetskih planova, automatizacija evidencija i mikrofilmovanje arhivske gradje.

Proces privatizacije, otkupa stanova, vraćanje gradjana na svoje posjede, identifikacija i obilježavanje državne granice i entitetskog razgraničenja ovisi u mnogome od stanja evidencija katastra i zemljišne knjige, te stanja arhivske gradje. Stoga, bih pozvao sve institucije, pa i pojedince, da se na ovom planu maksimalno angažuju, pruže pomoć i daju svoj doprinos.

Vlada Bosne i Hercegovine, sa svoje strane, učiniće što je u njenoj nadležnosti.

Hvala na pažnji. Ovim bih obilježavanje 110 godina katastra zemljišta proglasio otvorenim.